

s'y sont passées depuis vn an, ont esté perduës. Le Messager à qui on auoit confié les paquets nouuellement arriués, a esté volé entre la Rochelle & Paris. Vne boete qui estoit remplie de papiers & de Lettres a esté brisée, & tout ce qu'elle contenoit, ietté çà & là par les voleurs. Le pauvre Messager a ramassé tout ce qu'il a pû, & nous l'a apporté. C'est de là que nous tirerons vne partie du peu que nous allons dire.

La Relation de l'an passé, portoit que les cinq Nations Iroquoises estoient entrées dans vn grand pourparler de paix avec les François, & avec les originaires leurs Alliés. Quatre de ces Nations ont perseueré dans leur premier dessein de iouir des doux fruiçts de la paix. Elles n'ont fait aucun acte